



O‘ZBEKISTON RESPUBLIKASI PREZIDENTINING QARORI

2023 yil « 30 » март

№ПК–106

Жаҳон банки иштирокидаги “Ўзбекистон бинолари учун тоза энергия” лойиҳасини амалга ошириш чора-тадбирлари тўғрисида

Ўзбекистон Республикаси Президентининг 2020 йил 10 июлдаги “Иқтисодиётнинг энергия самарадорлигини ошириш ва мавжуд ресурсларни жалб этиш орқали иқтисодиёт тармоқларининг ёқилғи-энергетика маҳсулотларига қарамлигини камайтиришга доир қўшимча чора-тадбирлар тўғрисида”ги ПК–4779-сон ва 2022 йил 28 декабрдаги “Ўзбекистон Республикасининг 2023–2025 йилларга мўлжалланган инвестиция дастурини амалга ошириш чора тадбирлари тўғрисида”ги ПК–459-сон қарорларига мувофиқ, шунингдек, ижтимоий соҳа объектларида энергия самарадорлигини ошириш, электр энергияси ҳамда иссиқлик энергияси сарфини тежаш, уларни энергия тежайдиган технологиялар ва қайта тикланувчи энергия манбалари қурилмалари билан таъминлаш, норматив-ҳуқуқий базани такомиллаштириш ҳамда Жаҳон банки билан ҳамкорликни янада ривожлантириш мақсадида:

1. Қуйидагилар:

а) “Ўзбекистон бинолари учун тоза энергия” лойиҳасини (кейинги ўринларда – Лойиҳа) амалга ошириш учун Жаҳон банкининг Директорлар кенгаши 2022 йил 24 июнда Халқаро тараққиёт уюшмаси томонидан Ўзбекистон Республикасига **30 йил муддатга**, шу жумладан **5 йиллик имтиёзли давр билан 143,0 млн АҚШ доллари** миқдорида қарз маблағлари ажратилишини маъқуллагани;

б) Лойиҳа:

138,0 млн АҚШ доллари миқдоридаги молиялаштириш ҳажмига эга “Жамоат биноларида энергия самарадорлигини ошириш ҳамда тоза энергия учун инвестиция киритиш” компоненти;

5,0 млн АҚШ доллари миқдоридagi молиялаштириш ҳажмига эга **“Лойиҳа доирасида техник кўмак бериш, персоналлар салоҳиятини ошириш ҳамда унинг амалга оширилишини қўллаб-қувватлаш”** компонентидан иборат эканлиги маълумот учун қабул қилинсин.

2. Белгилансинки:

Лойиҳа 2023–2028 йиллар давомида Қорақалпоғистон Республикаси, барча вилоятлар ва Тошкент шаҳрида амалга оширилади;

Лойиҳанинг самарали амалга оширилиши учун Энергетика вазирлиги ҳузуридаги бюджетдан ташқари Тармоқлараро энергияни тежаш жамғармаси (кейинги ўринларда — Жамғарма) томонидан дастлабки босқичларда ушбу соҳада тажрибага эга бўлган **халқаро консултантлар** жалб қилинади ҳамда юридик шахс сифатида **Лойиҳани амалга ошириш гуруҳи** ташкил этилади;

Лойиҳани амалга ошириш жараёнига умумий ҳолда назорат қилиш ва мувофиқлаштиришга масъул **Лойиҳанинг амалга оширилишини мувофиқлаштириш бўйича идоралараро комиссия** (кейинги ўринларда — Комиссия) ва харидларни амалга ошириш учун **Идоралараро харид комиссияси** тузилади;

Лойиҳани амалга ошириш доирасида ҳосил бўладиган қўшилган қиймат солиғи суммаси қонунчиликда белгиланган тартибда **республика бюджети маблағлари ҳисобидан қоплаб берилади**;

Лойиҳани амалга ошириш доирасида қўшилган қиймат солиғи суммасини республика бюджети маблағлари ҳисобидан қоплаб бериш **Ўзбекистон Республикасининг Лойиҳани амалга оширишдаги улуши** деб ҳисобланади;

Жамғарманинг ижрочи директорига Лойиҳани амалга ошириш гуруҳи раҳбари ва ходимларига қонунчиликда тақиқланмаган манбалар ҳисобидан иш ҳақига **қўшимча ҳақ ва устамалар** белгилаш ҳуқуқи берилади;

Жамғарма ва Лойиҳани амалга ошириш гуруҳига, истисно тариқасида, Лойиҳа доирасида тижорат банкларида **миллий ва чет эл валюталарида махсус ҳисоб рақамлар** очишга рухсат берилади.

3. Қуйидагилар:

Жаҳон банки иштирокидаги “Ўзбекистон бинолари учун тоза энергия” лойиҳасининг асосий техник-иқтисодий параметрлари 1-иловага мувофиқ;

Жаҳон банки иштирокидаги “Ўзбекистон бинолари учун тоза энергия” лойиҳасини амалга ошириш доирасида Халқаро тараққиёт уюшмаси томонидан ажратиладиган қарз маблағларидан фойдаланиш, уларни қайтариш, комиссия ва фоиз тўловларини амалга ошириш бўйича прогноз графиги 2-иловага мувофиқ;

Жаҳон банки иштирокидаги “Ўзбекистон бинолари учун тоза энергия” лойиҳасини амалга ошириш бўйича “йўл харитаси” 3-иловага мувофиқ;

Жаҳон банки иштирокидаги “Ўзбекистон бинолари учун тоза энергия” лойиҳасининг амалга оширилишини мувофиқлаштириш бўйича идоралараро комиссия таркиби 4-иловага мувофиқ;

Жаҳон банки иштирокидаги “Ўзбекистон бинолари учун тоза энергия” лойиҳасининг амалга оширилишини мувофиқлаштириш бўйича идоралараро комиссия тўғрисидаги низом 5-иловага мувофиқ тасдиқлансин.

4. Бош вазир ўринбосари Ж.А. Қўчқоровга Ўзбекистон Республикаси номидан Халқаро тараққиёт уюшмаси билан молиявий битимни имзолаш ҳамда Иқтисодиёт ва молия вазирига Лойиҳани амалга оширувчи ташкилот битимини имзолаш, шунингдек, зарур ҳолларда, ушбу битимларга ўзгартириш ва қўшимчалар киритиш ваколати берилсин.

Бош вазир ўринбосари Ж.А. Қўчқоров икки ой муддатда Халқаро тараққиёт уюшмаси билан молиявий битим имзоланишини таъминласин.

Бунда, қарз маблағларини қайтариш манбалари сифатида қуйидагилар белгилансин:

модернизация қилинган объектларда коммунал хизматларни тўлаш бўйича харажатлар учун маҳаллий бюджетлардан ажратиладиган маблағларнинг иқтисод қилинган қисми;

иқтисод қилинган маблағларнинг етмаган қисми бўйича Давлат бюджети маблағлари ҳисобидан.

5. Иқтисодиёт ва молия вазирлиги:

Лойиҳани амалга оширишнинг дастлабки босқичларида (модернизация қилинадиган объектларда коммунал хизматларни тўлаш бўйича харажатлар учун маҳаллий бюджетлардан ажратиладиган маблағларнинг иқтисод қилинган қисми шаклангунга қадар) қарз маблағларининг ўзлаштирилган қисми бўйича фоиз тўловлари қоплаб берилиши;

модернизация қилинадиган объектларда коммунал хизматларни тўлаш бўйича харажатлар учун маҳаллий бюджетлардан ажратиладиган маблағларнинг иқтисод қилинган қисмини доимий тарзда Лойиҳани қайта молиялаштириш мақсадида Жамғармага ўтказиб берилишини таъминласин.

Бунда, коммунал хизматларни тўлаш бўйича харажатлар учун маблағларнинг иқтисод қилинган қисми объектларга ўрнатилган норматив миқдорларга нисбатан ҳисоблансин.

6. Соғлиқни сақлаш вазирлиги, Мактабгача ва мактаб таълими вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари Лойиҳанинг амалга оширилиши учун **зарур шарт-шароитлар** яратилишини, шу жумладан харид қилинадиган техника, қурилмалар ва бошқа асбоб-ускуналарни ўрнатиш ва монтаж қилиш учун **махсус жойлар (хоналар)** тайёрланишини таъминласин.

Бунда, Халқаро тараққиёт уюшмаси ҳамда миллий қонунчилик талабларига мувофиқ Лойиҳа доирасида зарур ҳисоботлар ва ҳужжатларнинг ўз вақтида тайёрланиши юзасидан жавобгарлик Соғлиқни сақлаш вазирлиги, Мактабгача ва мактаб таълими вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликларининг биринчи раҳбарларига юклатилсин.

7. Қуйидагилар:

а) Энергетика вазирлиги ва Жамғарма:

Лойиҳани ўз вақтида ва тўлиқ амалга оширишга жавобгар этиб;

жалб этилаётган қарз маблағларидан мақсадли ва самарали фойдаланиш, харидларни амалга ошириш, реконструкция ишларини назорат қилиш ва ҳисоботларни юритиш учун масъул ижро этувчи органлар этиб;

б) Жамғарма, Соғлиқни сақлаш вазирлиги, Мактабгача ва мактаб таълими вазирлиги модернизация (реконструкция) қилиниши режалаштирилган ижтимоий соҳа объектлари рўйхати шакллантирилиши ҳамда Лойиҳанинг мазкур рўйхатга киритилган объектларда муваффақиятли амалга оширилишига, уларнинг ҳудудий бошқармалари ва маҳаллий ҳокимликлар ҳузуридаги “Ягона буюртмачи хизмати” инжиниринг компаниялари эса – модернизация (реконструкция) қилинган объектларни қабул қилиб олишга масъул этиб белгилансин.

8. Энергетика вазирлиги Жамғарма билан биргаликда **икки ой муддатда** молиявий битим доирасида ажратилган қарз маблағларидан фойдаланиш, ижтимоий соҳа объектларини модернизация ва реконструкция қилиш жараёнини назорат қилиш ҳамда мазкур ишлар якунланганидан сўнг уларни қабул қилиш тартиби тўғрисидаги **низом лойиҳасини** ишлаб чиқиб, тасдиқлаш учун Комиссияга киритсин.

9. Адлия вазирлиги **бир ҳафта муддатда** Халқаро тараққиёт уюшмаси билан имзоланадиган молиявий битим юзасидан белгиланган тартибда **юримдик хулоса** берсин.

10. Қурилиш ва уй-жой коммунал хўжалиги вазирлиги:

Лойиҳа доирасида амалга ошириладиган қурилиш ишларининг лойиҳа-смета ҳужжатларининг белгиланган тартибда давлат экспертизасидан ўтказилиши;

Энергетика вазирлиги билан биргаликда бинолар энергия аудитидан ўтказилишининг мувофиқлаштирилиши;

Лойиҳа доирасида бажарилган қурилиш-монтаж ишлари сифати юзасидан тегишли давлат архитектура-қурилиш назорати олиб борилишини таъминласин.

Бунда, Лойиҳа доирасида қурилиш-таъмирлаш ишларини ташкил этиш ва бажариш бўйича фаолиятни йўлга қўйишдан олдин, белгиланган тартибда давлат экология экспертизасининг ижобий хулосаси олингандан сўнг қурилишга рухсат берилсин.

11. Мазкур қарорнинг ижросини самарали ташкил қилишга масъул ва шахсий жавобгар этиб энергетика вазири Ж.Т. Мирзамаҳмудов белгилансин.

Қарор ижросини муҳокама қилиб бориш, ижро учун масъул идоралар фаолиятини мувофиқлаштириш ва назорат қилиш Ўзбекистон Республикаси Бош вазири А.Н. Арипов зиммасига юклансин.

**Ўзбекистон Республикаси
Президенти**



Ш. Мирзиёев

Тошкент шаҳри

Ўзбекистон Республикаси Президентининг
2023 йил 30 мартдаги ПҚ–106-сон қарорига
1-илова

**Жаҳон банки иштирокидаги “Ўзбекистон бинолари учун тоза энергия” лойиҳасининг
АСОСИЙ ТЕХНИК-ИҚТИСОДИЙ ПАРАМЕТРЛАРИ**

минг АҚШ доллари

Т/р	Бўлим номи	Жами*	Молиялаштиришнинг тахминий миқдори	
			қарз маблағлари	республика бюджети маблағлари
I.	Лойиҳанинг умумий қиймати	175 611	143 000	32 611
II.	Инвестициялар миқдори	143 000	143 000	–
III.	Лойиҳа компонентлари			
1.	1-компонент: Жамоат биноларида энергия самарадорлигини ошириш ҳамда тоза энергия учун инвестиция киритиш	138 000	138 000	–
	- қурилиш молларини (иссиқлик изоляция материаллари, қувурлар, эшик ва ойна ромлари, қурилиш материаллари) ва ускуналарни (қайта тикланувчи энергия манбалари қурилмалари, иситиш тизими, иситиш қозонлари ва ҳ.к.) сотиб олиш; - қурилиш-монтаж ишлари; - энергия аудит хизматлари.	138 000	138 000	–

Т/р	Бўлим номи	Жами*	Молиялаштиришнинг тахминий миқдори	
			қарз маблағлари	республика бюджети маблағлари
2.	2-компонент: Лойиҳа доирасида техник кўмак бериш, персоналлар салоҳиятини ошириш ҳамда унинг амалга оширилишини қўллаб-қувватлаш	5 000	5 000	–
	<ul style="list-style-type: none"> - консультантларни жалб қилиш учун харажатлар; - аудит ўтказиш учун харажатлар; - Лойиҳа доирасида тадбирларни амалга ошириш; - Лойиҳани амалга ошириш гуруҳини ташкил этиш ва унинг моддий-техника базасини яратиш; - Жамғарманинг моддий-техника базасини яратиш; - Лойиҳа доирасидаги зарур ускуналар (энергия аудити учун керакли ускуналар)ни харид қилиш; - мутахассисларни ўқитиш ва тренинглар ўтказиш; - Лойиҳа доирасидаги операцион харажатлар. 	5 000	5 000	–
IV.	Ўзбекистон Республикасининг солиқ тўловлари бўйича қўшган ҳиссаси **	21 450	–	21 450
V.	Молиявий харажатлар	11 161	–	11 161
VI.	Лойиҳани амалга ошириш даври	2023–2028 йиллар		
VII.	Қарз маблағларини қайтариш муддати	30 йил		
	шу жумладан, асосий қарзнинг имтиёзли даври	5 йил		

* Яқуний қиймат кўрсаткичлари батафсил лойиҳа-смета ҳужжатларини ишлаб чиқиш, товарларни етказиб бериш юзасидан тендерлар ва хизматларни бажариш натижалари бўйича аниқланади.

Энергетика вазирлигига Лойиҳа доирасида ажратилиб, иқтисод қилинган маблағларни молиялаштиришнинг устувор йўналишларидан келиб чиқиб, Жаҳон банки билан келишилган ҳолда қайта тақсимлаш ҳуқуқи берилади.

** Лойиҳа доирасидаги солиқлар ва молиявий ушланмалар лойиҳа-смета ҳужжатларидан келиб чиқиб, Ўзбекистон Республикасининг лойиҳадаги ўз улуши сифатида Давлат бюджети маблағлари ҳисобидан қоплаб берилиши назарда тутилган.

**Жаҳон банки иштирокидаги “Ўзбекистон бинолари учун тоза энергия” лойиҳасини
амалга ошириш доирасида Халқаро тараққиёт уюшмаси томонидан ажратиладиган қарзлардан
фойдаланиш, уларни қайтариш, комиссия ва фоиз тўловларини амалга ошириш бўйича
ПРОГНОЗ ГРАФИГИ**

Кредит муддати – 30 йил

Имтиёзли давр – 5 йил

Хизмат кўрсатиш учун комиссия – 0,75% + созлаш ставкаси (0,56%)

Фоиз ставкаси – 1,25% + созлаш устамаси (0,10%)

Захирага қўйиш учун комиссия тўлови – 0,50%

Тўлов санаси	Ўзлаштириш	Кредит баланси	Хизмат кўрсатиш комиссияси	Фоиз тўловлари	Захирага қўйиш учун комиссия тўлови	Асосий қарздан тўловлар	Жами тўловлар
*/15/2023	5,500	5,500			358		358
8/15/2023	5,500	11,000	36	37	344		417
2/15/2024	8,615	19,615	72	74	330		476
8/15/2024	8,615	28,230	128	132	308		569
2/15/2025	11,465	39,695	185	191	287		662
8/15/2025	11,465	51,160	260	268	258		786
2/15/2026	15,405	66,565	335	345	230		910
8/15/2026	15,405	81,970	436	449	191		1,076
2/15/2027	16,195	98,165	537	553	153		1,243

Тўлов санаси	Ўзлаштириш	Кредит баланси	Хизмат кўрсатиш комиссияси	Фоииз тўловлари	Захирага қўйиш учун комиссия тўлови	Асосий қарздан тўловлар	Жами тўловлар
8/15/2027	16,195	112,001	643	663	112	2,360	3,777
2/15/2028	14,320	123,961	734	756	72	2,360	3,921
8/15/2028	14,320	135,922	812	837	36	2,360	4,044
2/15/2029		133,562	890	917		2,360	4,167
8/15/2029		131,203	875	902		2,360	4,136
2/15/2030		128,843	859	886		2,360	4,104
8/15/2030		126,484	844	870		2,360	4,073
2/15/2031		124,124	828	854		2,360	4,042
8/15/2031		121,765	813	838		2,360	4,010
2/15/2032		119,405	798	822		2,360	3,979
8/15/2032		117,046	782	806		2,360	3,948
2/15/2033		114,686	767	790		2,360	3,916
8/15/2033		112,327	751	774		2,360	3,885
2/15/2034		109,967	736	758		2,360	3,853
8/15/2034		107,608	720	742		2,360	3,822
2/15/2035		105,248	705	726		2,360	3,791
8/15/2035		102,889	689	710		2,360	3,759
2/15/2036		100,529	674	694		2,360	3,728
8/15/2036		98,170	658	679		2,360	3,697
2/15/2037		95,810	643	663		2,360	3,665
8/15/2037		93,451	628	647		2,360	3,634
2/15/2038		91,091	612	631		2,360	3,602
8/15/2038		88,732	597	615		2,360	3,571
2/15/2039		86,372	581	599		2,360	3,540
8/15/2039		84,013	566	583		2,360	3,508
2/15/2040		81,653	550	567		2,360	3,477
8/15/2040		79,294	535	551		2,360	3,445
2/15/2041		76,934	519	535		2,360	3,414

Тўлов санаси	Ўзлаштириш	Кредит баланси	Хизмат кўрсатиш комиссияси	Фоииз тўловлари	Захирага қўйиш учун комиссия тўлови	Асосий қарздан тўловлар	Жами тўловлар
8/15/2041		74,575	504	519		2,360	3,383
2/15/2042		72,215	488	503		2,360	3,351
8/15/2042		69,856	473	487		2,360	3,320
2/15/2043		67,496	458	472		2,360	3,289
8/15/2043		65,137	442	456		2,360	3,257
2/15/2044		62,777	427	440		2,360	3,226
8/15/2044		60,418	411	424		2,360	3,194
2/15/2045		58,058	396	408		2,360	3,163
8/15/2045		55,699	380	392		2,360	3,132
2/15/2046		53,339	365	376		2,360	3,100
8/15/2046		50,980	349	360		2,360	3,069
2/15/2047		48,620	334	344		2,360	3,038
8/15/2047		43,758	318	328		4,862	5,509
2/15/2048		38,896	287	295		4,862	5,444
8/15/2048		34,034	255	263		4,862	5,379
2/15/2049		29,172	223	230		4,862	5,315
8/15/2049		24,310	191	197		4,862	5,250
2/15/2050		19,448	159	164		4,862	5,185
8/15/2050		14,586	127	131		4,862	5,121
2/15/2051		9,724	96	98		4,862	5,056
8/15/2051		4,862	64	66		4,862	4,991
2/15/2052			32	33		4,862	4,927
Жами	143,000		28,577.26	29,449.85	2,677.65	143,000	203,704.75

* Молиявий битим имзолангандан сўнг, тўловнинг дастлабки санаси аниқланади.

**Жаҳон банки иштирокидаги “Ўзбекистон бинолари учун тоза энергия”
лойиҳасини амалга ошириш бўйича
“ЙЎЛ ХАРИТАСИ”**

Т/р	Чора-тадбирнинг номи	Муддати	Масъул ижрочилар
1.	Жаҳон банки тартиб-таомилларига мувофиқ Лойиҳани амалга ошириш бўйича қўлланмани (Project Operation Manual) ишлаб чиқиш ва тасдиқлаш.	2023 йил май	Энергетика вазирлиги (<i>Ж.Мирзамаҳмудов</i>), Тармоқлараро энергияни тежаш жамғармаси (<i>Э.Раҳманов</i>)
2.	Лойиҳа доирасида тегишли ва масъул бўлган шахслар имзоларининг намуналарини тасдиқлаш ва Халқаро тараққиёт уюшмасига тақдим этиш.	2023 йил май	Энергетика вазирлиги (<i>Ж. Мирзамаҳмудов</i>), Тармоқлараро энергияни тежаш жамғармаси (<i>Э.Раҳманов</i>)
3.	Халқаро тараққиёт уюшмаси билан қарз маблағларини олиш бўйича молиявий битимни имзолаш.	2023 йил май	Вазирлар Маҳкамаси (<i>Ж.Қўчқоров</i>), Иқтисодиёт ва молия вазирлиги (<i>Ш.Кудбиев</i>), Энергетика вазирлиги (<i>Ж.Мирзамаҳмудов</i>), Тармоқлараро энергияни тежаш жамғармаси (<i>Э.Раҳманов</i>)

Т/р	Чора-тадбирнинг номи	Муддати	Масъул ижрочилар
4.	Иқтисодиёт ва молия вазирлиги ҳамда Тармоқлараро энергияни тежаш жамғармаси ўртасида Лойиҳани амалга ошириш бўйича битим имзолаш.	2023 йил май	Иқтисодиёт ва молия вазирлиги (Ш.Кудбиев), Энергетика вазирлиги (Ж. Мирзамаҳмудов), Тармоқлараро энергияни тежаш жамғармаси (Э.Рахманов)
5.	Жаҳон банки талабларига мувофиқ идоралараро харид комиссияси таркибини шакллантириш.	2023 йил июнь	Энергетика вазирлиги (Ж.Мирзамаҳмудов), Тармоқлараро энергияни тежаш жамғармаси (Э.Рахманов)
6.	Жаҳон банки талабларига мувофиқ Лойиҳани амалга ошириш гуруҳини ташкил этиш.	2023 йил сентябрь	Энергетика вазирлиги (Ж.Мирзамаҳмудов), Тармоқлараро энергияни тежаш жамғармаси (Э.Рахманов)
7.	Жаҳон банки талабларига мувофиқ Лойиҳани амалга оширишга кўмаклашиш учун халқаро консультантларни жалб қилиш.	2023 йил июнь	Энергетика вазирлиги (Ж. Мирзамаҳмудов), Тармоқлараро энергияни тежаш жамғармаси (Э.Рахманов)
8.	Лойиҳа доирасида реконструкция (модернизация) қилиниши кўзда тутилган объектлар рўйхатини шакллантириш.	2023 йил май	Энергетика вазирлиги (Ж.Мирзамаҳмудов), Тармоқлараро энергияни тежаш жамғармаси (Э.Рахманов),

Т/р	Чора-тадбирнинг номи	Муддати	Масъул ижрочилар
			Мактабгача ва мактаб таълими вазирлиги (Х.Умарова), Соғликни сақлаш вазирлиги (А.Иноятов)
9.	Лойиҳани амалга ошириш мобайнида йиллик белгиланган ўзлаштириш прогнозларининг бажарилиши, Лойиҳанинг ўз муддатида ва сифатли амалга оширилиши, Лойиҳанинг бюджет параметрлари ҳамда кўрсаткичлари устидан доимий назорат олиб бориш.	Лойиҳани амалга ошириш даврида	Энергетика вазирлиги (Ж.Мирзамаҳмудов), Тармоқлараро энергияни тежаш жамғармаси (Э.Раҳманов), Мактабгача ва мактаб таълими вазирлиги (Х.Умарова), Соғликни сақлаш вазирлиги (А.Иноятов), Иқтисодиёт ва молия вазирлиги (Ш.Кудбиев)
10.	Жалб қилинган қарз маблағларини Халқаро тараққиёт уюшмасига ўз вақтида қайтариш юзасидан тегишли чора-тадбирларни амалга ошириш.	доимий	Иқтисодиёт ва молия вазирлиги (Ш.Кудбиев)

Ўзбекистон Республикаси Президентининг
2023 йил 30 мартдаги ПҚ–106-сон қарорига
4-илова

**Жаҳон банки иштирокидаги “Ўзбекистон бинолари учун тоза энергия”
лойиҳасининг амалга оширилишини мувофиқлаштириш бўйича
идоралараро комиссия
ТАРКИБИ**

1. Ж.Т. Мирзамаҳмудов – энергетика вазири, *Комиссия раиси*
2. И.И. Норқулов – иқтисодиёт ва молия вазирининг ўринбосари, *Комиссия раисининг ўринбосари*
3. Н.Қ. Холмуродов – инвестициялар, саноат ва савдо вазирининг биринчи ўринбосари
4. У.Ю. Собиров – соғлиқни сақлаш вазирининг ўринбосари
5. Т.К. Комилов – мактабгача ва мактаб таълими вазирининг ўринбосари
6. Э. Б. Рахманов – Тармоқлараро энергияни тежаш жамғармаси ижрочи директори

**Жаҳон банки иштирокидаги “Ўзбекистон бинолари учун тоза энергия”
лойиҳасининг амалга оширилишини мувофиқлаштириш бўйича
идоралараро комиссия тўғрисида
НИЗОМ**

1-боб. Умумий қоидалар

1. Ушбу Низом Жаҳон банки иштирокидаги “Ўзбекистон бинолари учун тоза энергия” лойиҳасининг амалга оширилишини мувофиқлаштириш бўйича идоралараро комиссия (кейинги ўринларда – Комиссия) мақоми, асосий вазифаларини, Комиссия аъзоларининг ҳуқуқлари, мажбуриятлари ва жавобгарлигини белгилайди ҳамда уларнинг фаолиятини тартибга солади.

2. Қўйидагилар Комиссиянинг асосий вазифалари ҳисобланади:

Жаҳон банки иштирокидаги “Ўзбекистон бинолари учун тоза энергия” лойиҳасини (кейинги ўринларда – Лойиҳа) амалга оширишда идоралараро ўзаро ҳамкорлик ҳамда маълумот алмашинувини мувофиқлаштириш;

Лойиҳа доирасида модернизация (реконструкция) қилинадиган объектлар рўйхатининг ўз вақтида ва сифатли шакллантирилишини таъминлаш;

шакллантирилган рўйхат бўйича объектларни қўшиш ва чиқариб ташлаш масалаларини ҳал қилиш;

Лойиҳани амалга ошириш жараёни, шу жумладан қурилиш ишлари ва консультантлар фаолиятини доимий назорат қилиш ҳамда аниқланган камчиликларни ўз вақтида бартараф қилиш;

Лойиҳа доирасида маблағларнинг мақсадли сарфланиши, шунингдек, амалга оширилаётган ишлар ва ажратилган маблағлардан фойдаланиш самарадорлиги ва натижадорлиги тўғрисида белгиланган тартибда тузиладиган ишчи гуруҳларнинг ҳисоботларини доимий равишда эшитиб бориш;

Лойиҳа доирасида маблағлардан мақсадсиз фойдаланиш ҳолатлари аниқланган тақдирда, асоссиз амалга оширилган харажатлар ва етказилган зарарни қоплаш ҳамда суиистеъмол қилиш ҳолатларини бартараф этиш чораларини кўриш.

2-боб. Комиссиянинг ҳуқуқлари

3. Комиссия ўз ваколатлари доирасида қуйидаги ҳуқуқларга эга:

Лойиҳанинг ўз вақтида ва сифатли амалга оширилиши учун зарур бўлган қарорлар қабул қилиш;

Лойиҳанинг техник-иқтисодий кўрсаткичларига ўзгартириш киритиш тўғрисидаги таклифларни кўриб чиқиш;

Лойиҳа доирасида бажарилган ишлар бўйича ахборот ва материалларни талаб қилиб олиш;

Лойиҳа доирасида бажарилаётган ишлар бўйича аффилиланган шахслар билан тузилаётган шартномаларни кўриб чиқиш;

Лойиҳанинг самарали амалга оширилишини таъминлаш ва аниқланган камчиликларни бартараф этиш юзасидан тегишли кўрсатмалар бериш.

Комиссия қонунчиликда назарда тутилган бошқа ҳуқуқларга ҳам эга бўлиши мумкин.

4. Комиссия ҳуқуқлари ижро этиш учун учинчи шахсларга, шу жумладан Комиссиянинг бошқа аъзоларига ўтказилиши мумкин эмас, бундан қонунчиликда назарда тутилган ҳоллар мустасно.

5. Комиссия Лойиҳанинг самарали ва мақсадли бошқарилишини, шу жумладан Лойиҳани амалга ошириш гуруҳи ваколатлари ҳамда жавобгарлиги тақсимланишини, манфаатлар тўқнашувининг олди олинишини ва уларнинг бартараф этилишини таъминлайдиган бошқарувнинг ташкилий тузилмасини белгилайди ҳамда унинг жорий этилиши устидан назоратни амалга оширади.

3-боб. Комиссия таркиби

6. Комиссия таркиби Ўзбекистон Республикаси Президенти томонидан тасдиқланади.

7. Комиссия аъзолари бошқа ишга ўтган тақдирда, унинг таркибига ушбу лавозимларга янги тайинланган ёки тегишли функцияларни бажариш зиммасига юкланган шахслар киритилади.

4-боб. Комиссия раиси

8. Комиссия раиси Комиссия фаолиятини ташкил этади, Комиссия мажлисларида раислик қилади ҳамда Комиссия мажлисларининг баённомаси юритилишини назорат қилади.

9. Комиссия раиси узрли сабабларга кўра бўлмаган тақдирда, унинг вазифасини Комиссия раисининг ўринбосари амалга оширади.

10. Комиссия аъзолари ўртасидаги функцияларни тақсимлаш Комиссия раиси томонидан Комиссиянинг ҳар бир маълум аъзоси учун амалга оширилади.

5-боб. Комиссия аъзоларининг ҳуқуқлари, мажбуриятлари ва жавобгарлиги

11. Комиссия аъзоси қуйидаги ҳуқуқларга эга:

Комиссия мажлисида шахсан иштирок этиш ва регламент билан ажратилган вақт доирасида мажлисда муҳокама қилинадиган масала бўйича сўзга чиқиш;

ўзи ифода этаётган вазирлик (идора) тасарруфидаги объектлар модернизацияси (реконструкцияси) бўйича таклифлар бериш;

қонунчиликда назарда тутилган бошқа ҳуқуқлар.

12. Комиссия аъзолари ўзларининг ҳуқуқ ва мажбуриятларини амалга оширишда Лойиҳани амалга ошириш манфаатларидан келиб чиқиб ҳаракат қилиши, ўз вазифаларини ваколатлари доирасида ҳалол бажариши, Лойиҳа истиқболи йўлида улар энг яхши деб ҳисоблайдиган усул билан иш кўриши, шунингдек, Лойиҳа билан боғлиқ бўлган тижорат сирини ошкор қилмаслиги шарт.

13. Комиссия аъзолари Лойиҳани амалга оширишда ўз вазифаларини бажармаслиги ёки лозим даражада бажармаслиги учун белгиланган тартибда жавобгар бўлади.

6-боб. Комиссия мажлиси

14. Комиссия мажлисининг кун тартиби Комиссия раиси томонидан белгиланади.

15. Комиссия мажлиси Комиссия аъзоларининг камида учдан икки қисми иштирок этганда ваколатли ҳисобланади.

16. Комиссия қарорлари мажлисда қатнашган Комиссия аъзоларининг оддий кўпчилик овози билан қабул қилинади.

17. Комиссия мажлисларида овоз бериш бюллетенни тўлдириш орқали амалга оширилади.

Бюллетенни расмийлаштиришда мажлиснинг кун тартиби, мажлис ўтказиш санаси, вақти ва жойи, овоз беришга қўйилган ҳар бир масаланинг таърифи ва уни кўриб чиқиш навбати, ҳар бир масала бўйича овоз бериш учун “Рози”, “Қарши” ёки “Бетараф” устунларига “+” ёхуд “✓” белгилардан бири қўйилиши ҳамда Комиссия аъзосининг исми ва фамилияси кўрсатилган қаторга имзо қўйиш лозимлиги тўғрисида акс эттирилади.

18. Комиссия қарорлари Комиссия мажлисининг баённомаси билан расмийлаштирилади. Комиссия мажлисининг баённомаси Комиссия раиси томонидан тасдиқланади.

19. Комиссиянинг мажлиси баённомасида қуйидагилар кўрсатилади:

мажлис ўтказилган сана, вақти ва жойи;

мажлисда ҳозир бўлган шахслар;

мажлиснинг кун тартиби;

овоз беришга қўйилган масалалар, улар юзасидан ўтказилган овоз бериш якунлари;

Комиссия томонидан қабул қилинган қарор мазмуни.

20. Комиссия мажлисининг баённомаси имзоланган кунни Жамғарманинг ижрочи директорига ва (ёки) Лойиҳани амалга ошириш гуруҳи раҳбарига ижро этиш учун топширилади.

21. Комиссия аъзолари томонидан тўлдирилган ва ўз қўли билан имзоланган овоз бериш бюллетенлари Комиссия котибига топширилади.

7-боб. Яқуний қоидалар

22. Комиссия қарорларининг ижросини назорат қилиш Комиссия раиси томонидан амалга оширилади.

23. Мазкур Низом талабларини бузишда айбдор бўлган шахслар белгиланган тартибда жавобгар бўладилар.

